

四庫全書

史部

欽定四庫全書

史部

山西通志卷一百十五

詳校官給事中臣王鍾健

檢討臣德生覆勘

總校官進士臣朱鈐

校對官學正臣常循

謄錄監生臣舒秀岐

欽定四庫全書

山西通志卷一百十五

人物

十五

大同府

周

代成君趙簡子孫伯魯子也伯魯故太子早卒趙襄子
殺代王遂以代封伯魯子周為代成君襄子為伯魯
之不立也不肯立子必欲傳位於代成君成君先卒

乃取其子浣立為太子襄子卒浣立是為獻侯

漢

馮唐其先趙人父徙代又徙安陵唐以孝著為郎中中郎署長文帝輦過問曰吾居代時尚食監高祛數為我言趙將李齊之賢戰於鉅鹿下吾每飲食意未嘗不在鉅鹿也父老知之乎唐對曰齊尚不如廉頗李牧之為將也上拊髀曰嗟乎吾獨不得廉頗李牧為將豈憂寇哉唐曰主臣陛下雖有廉頗李牧不能用

也上怒起入禁中良久召唐讓之唐謝曰鄙人不知
忌諱當是時寇新大入朝那殺北地都尉昂上以寇
為意乃卒復問曰公何以言吾不能用頗牧也唐對
曰臣聞上古王者遣將跪而推轂曰閫以內寡人制
之閫以外將軍制之軍功爵賞皆決於外歸而奏之
此非空言也臣大父言李牧之為趙將居邊軍市之
租皆自用饗士賞賜決於外不從中覆委任而責成
功故李牧乃得盡其智能選車千三百乘彀騎萬三

千匹百金之士十萬是以北逐單于破東胡滅澹林
西抑強秦南支韓魏當是時趙幾伯後會趙王遷立
其母倡也用郭開讒而誅李牧令顏聚代之是以為
秦所滅今臣竊聞魏尚為雲中守軍租盡以給士卒
出私養錢五日一殺牛以饗賓客軍吏舍人是以寇
遠避不近雲中之塞嘗一入邊尚帥車騎擊之所殺
甚衆夫士卒盡家人子起田中從軍安知尺籍伍符
終日力戰斬首捕虜上功幕府一言不相應文吏以

法繩之其賞不行吏奉法必用愚以為法太明賞太輕罰太重且雲中守尚坐上功首虜差六級而下之吏削其爵罰作之由此言之陛下雖得廉頗李牧不能用也文帝說是日令唐持節赦魏尚復以為雲中守而拜唐為車騎都尉景帝立為楚相武帝求賢良舉唐時年九十餘乃以子遂為郎遂字王孫亦奇士李沮雲中人事景帝武帝十七歲以左內史為彊弩將軍後一歲復為彊弩將軍

郭昌雲中以校尉從大將軍元封四年以大中大夫
為拔胡將軍屯朔方

趙綰代人嘗受詩申公為御史大夫與蘭陵王臧請立
明堂以朝諸侯不能就其事乃言其師申公武帝使
使東帛加璧安車駟馬迎申公至以為大中大夫舍
魯邸議明堂事竇太后喜老子言不悅儒術得綰臧
之過以讓上上因廢明堂事下綰臧吏皆自殺

程緒代郡人為幽州牧劉虞從事初平四年冬虞自率

諸屯兵衆合十萬人以攻公孫瓚將行緒免冑而前
曰公孫瓚雖有過惡而罪名未正明公不先告曉使
得改行而兵起蕭牆非國之利加勝敗難保不如駐
兵以武臨之瓚必悔禍謝罪所謂不戰而服人者也
虞以緒臨事沮議遂斬之

韓珩字子佩代郡人清粹有雅量少喪父母奉養兄姊
宗族稱孝弟焉為幽州別駕袁氏將焦觸驅率諸郡
太守令長背袁向曹盟曰違命者斬衆以次歆珩曰

吾受袁公父子厚恩今其破亡智不能救勇不能死
於義闕矣若乃北面于曹氏所弗能為也一坐失色
觸曰事之濟否不待一人可卒珩志以勵事君魏武
亦高其節屢辟不至卒於家

元魏

衛操字德元代人少通俠有才畧晉征北將軍衛瓘以
為牙門將當神元時頗自結附後說桓穆二帝招納
晉人桓帝以為輔相任以國事及劉石之亂桓帝亡

助晉氏操稍遷至右將軍封定襄侯穆帝三年卒

賀訥代人魏道武皇帝之舅獻明后之兄也祖紇尚平
文女父野干尚昭成女遼西公主昭成諸部紛擾獻
明后與道武及衛秦二王依訥會苻堅使劉庫仁分
攝國事道武還居獨孤訥總東部為大人遷居大甯
行其恩信衆多歸之侔於庫仁苻堅假訥鷹揚將軍
劉顯之難道武輕騎歸訥驚拜曰官家復國當念
老臣帝笑答曰誠如舅言要不忘也後與諸大人勸

進道武登代王位於牛川從平中原拜安遠將軍以元舅甚見尊重然無統領以壽終於家

賀悅訥從弟道武居賀蘭部下人情未甚附惟悅舉部隨從又密為帝祈禱天神請成大業出於誠至帝嘉之甚見寵待後平中原以功賜爵鉅鹿侯進爵北新公卒子泥襲降肥如侯清河之變泥出舉烽於安陽城北賀蘭部人皆往赴之明元即位乃罷與元渾等八人拾遺左右與安同行并定二州州郡肅然後從

征赫連昌以功進爵琅琊公軍國大議每叅預焉征
蠕蠕為別道將坐逐賊不進贖為庶人拜光祿勳為
外都大官復爵卒子醜建襲

長孫嵩代人父仁昭成時為南部大人嵩寬雅有器度
昭成賜名焉年十四代父統事昭成末劉庫仁攝國
事嵩率部衆歸之劉顯謀難嵩率舊人及庶師七百
餘家棄顯走將至五原于烏渥勸歸道武見道武於
三漢亭為南部大人累著軍功後從征中山除冀州

刺史賜爵鉅鹿公歷侍中司徒相州刺史封南平公
所在著稱明元初與山陽侯奚斤北新侯安同白馬
侯崔宏等八人坐止車門右聽理萬幾世號八公宋
武帝伐姚泓明元假嵩節督山東諸軍事傳詣平原
緣河北岸列軍次於畔城軍頗失利詔假宋武道宋
武於舟中望嵩麾蓋遺以鄴酒及江南食物嵩皆送
京師詔厚答之又敕簡精兵為戰備嵩與叔孫建等
自成臯南濟晉諸屯戍皆望塵奔潰會宋武克長安

乃班師明元末問後事於嵩嵩曰立長則順以德則人服今皇長子賢而世嫡天所命也請立之乃定策詔太武臨朝監國嵩為左輔太武即位進爵北平王司州中正議征屈丐嵩固諫不可帝責之尋遷太尉加柱國大將軍自是輦駕征伐嵩以元老多留鎮京師坐朝堂平斷刑獄卒年八十諡曰宣王孝文時配饗廟庭子頽善騎射彎弓三百斤襲爵加侍中征南大將軍有罪黜為兵復爵卒諡曰安子敦字孝友位

北鎮都將降公孝文時復王爵卒謚曰簡子道字念
僧襲爵例降公位左衛將軍卒謚慎子悅襲建義初
復王爵尋降公位光祿少卿卒

庾業延代人賜名岳其父及兄和辰世典畜牧稍轉中
部大人收斂畜產富擬國君劉顯之變道武外幸和
辰奉獻明太后歸道武又得其資用以和辰為內侍
長岳恭慎脩謹善處危難之間道武嘉之為外朝大
人參預軍國從平中原拜安遠將軍詔岳討破離石

胡帥呼延鐵西河胡帥張崇等以功賜爵西昌公遷
鄴行臺岳為將有謀畧士衆服其智勇名冠諸將及
罷鄴行臺以所統六郡置相州即拜岳為刺史秉法
平當百姓稱之鄴舊有園池時果初熟吏送之岳不
受曰果未進御吾何得先食其謹如此遷司空以候
官誣告誅時人咸冤惜焉岳葬在代西善無界後太
武征赫連氏經其墓詔為立廟求子孫任為帥者得
其子陵從征有功聽襲爵

奚斤代人世為馬牧父簞嘗以取騶馬傷國甥劉庫
仁一乳及苻堅使庫仁與衛辰分領國部簞懼奔衛
辰及道武滅衛辰簞晚乃得歸故名位後於舊臣後
以斤貴贈長寧子斤機辨有識度登國初統禁兵後
為侍郎從征慕容寶於參合皇始初拜越騎校尉典
宿衛博陵渤海章武盜起斤與元遵等討平之從破
高車及庫狄宥連部徙其別部於塞南又進擊侯莫
陳部至太娥谷置戍而還遷都水使者出為晉兵將

軍幽州刺史賜爵山陽侯明元時為鄭兵將軍明元
幸雲中斤留守京師昌黎王慕容伯兒不軌召入天
安殿東廡下誅之詔與長孫嵩等俱坐朝堂錄決囚
徒明元大閱東郊行左丞相大蒐於石會山從西巡
先驅討越勒部於鹿那山大破之又詔與長孫嵩等
八人坐止車門左聽理萬機拜天部大人進爵公命
出入乘輅軒備威儀導從太武聽朝政為左輔宋帝
立其國內離阻乃遣斤收河南地假節都督前鋒諸

軍事司空晉兵大將軍行揚州刺史率吳兵將軍公
孫表等南征攻滑臺不拔求濟師帝親南巡次中山
斤自滑臺趣洛陽長驅至虎牢遂平兗豫諸郡還圍
虎牢虎牢潰斤置守宰以撫之自魏初大將行兵唯
長孫嵩拒宋武斤征河南獨給漏刻及十二牙旗太
武時進爵宜城王仍為司空太武征赫連昌斤率義
兵將軍封禮等襲蒲坂斤又西據長城秦雍氐羌皆
來歸附累戰破赫連定定走上邽追至雍不及而還

詔班師斤請因其危平之乃進討安定昌退保平涼
斤屯軍安定以糧竭馬死深壘自固監軍侍御史安
頡擊昌擒之昌衆復立昌弟定斤恥功不在已乃舍
輜重追定於平涼定邀斤前後斤衆潰斤及將娥清
劉拔被擒後太武克平涼斤得歸尋拜安東將軍降
爵為公太延初為衛尉改恒農王後為萬騎大將軍
議伐涼州斤等三十餘人以為不可涼州平以戰功
賜僮隸七十戶又賜安車以寵異之斤聰辨強識善

談論遠說先朝故事歷歷不爽聽者歎美之每議大政多見從用朝廷由是稱焉真君九年卒年八十有九太武親臨哀慟謚曰昭王長子他觀襲降公傳國至孫緒無子國除太和中斤配饗廟庭至宣武時以緒弟子監紹其後

長孫肥代人昭成時年十三以選內侍少有雅度果毅少言道武在獨孤及賀蘭部常侍從禦侮左右帝深信任之登國初為大將屢有軍功從平中山以功賜

爵琅琊公遷衛尉卿改爵盧鄉時中山太守仇儒推
趙準為主肥討破準於九門斬仇儒擒準除兗州刺
史姚平寇平陽徵為前鋒平退保柴壁進攻屠之還
鎮兗州撫慰河南威信著於淮泗善策謀勇冠諸將
前後征討未嘗失敗故每有大難令肥當之南平中
原西摧羌寇肥功居多賞賜千計後降爵藍田侯卒
諡曰武陪葬金陵

叔孫建代人少以智勇著稱道武幸賀蘭部常從左右

登國初為外朝大人與安同等十三人迭典庶事參
軍國謀隨秦王觚使後燕歷六載乃還累遷中領軍
賜爵安平公出為并州刺史後免明元念前功以為
正直將軍相州刺史饑胡劉武等聚黨假建前號安
平公督公孫表等討之斬首萬餘級餘衆奔投洹水
水為不流晉將王仲德逼滑臺兗州刺史尉建遁仲
德遂入滑臺詔建渡河曜威斬尉建呼仲德軍人詰
其侵境之狀尋遷廣阿鎮將威名甚著久之除使持

節都督前鋒諸軍事楚兵將軍徐州刺史率衆自平原濟河徇下青兗諸郡遂東入青州圍宋刺史竺夔于東陽城宋遣將檀道濟王仲德救夔建乃還以功賜爵壽光公與汝陰公長孫道生濟河而南仲德等東走青州太武以建威名南震為宋所憚除平原鎮大將封丹陽王加征南大將軍道濟仲德救滑臺建與汝陰公道生拒擊之建分軍挾戰縱輕騎邀其前後焚燒穀草以絕其糧道道濟兵饑叛者相繼由是

安頡等得拔滑臺建沈敏多智東西征伐常為謀主
容貌清整雅尚人倫禮賢愛士在平原十餘年綏懷
內外甚得邊稱魏初名將鮮及之南方憚其威畧輒
不為寇太延三年卒年七十三諡曰襄賜葬金陵

尉古真代人道武在賀蘭部賀染干遣侯引乙突等圖
之古真密以馳告染干疑泄其謀以兩車軸押古真
頭傷一目不服乃免後從平中原以功賜爵東川侯
明元初為鴻飛將軍鎮太洛卒於定州刺史子億萬

襲

羅結代人從道武幸賀蘭部賜爵屈蛇侯太武初累遷
侍中外都大官總三十六曹事年一百七歲精爽不
衰太武以其忠慤甚信待之監典後宮出入卧內因
除長秋卿年一百一十詔聽歸老賜大甯東川為私
第別業并為築城號羅侯城朝廷每有大事驛馬詢
焉年一百二十卒諡曰正子斤從討赫連昌力戰有
功歷四部尚書從平涼州賜爵帶方公除長安鎮都

大將蠕蠕侵境除柔元鎮都大將卒謚曰靜陪葬金陵子敢襲位庫部尚書卒子伊利襲

婁伏連代人忠厚有器量年十三襲父領部落道武初從破賀蘭部又平中山及征姚平於柴壁以功賜爵安邑侯明元時為晉兵將軍并州刺史太武即位封廣陵公再遷光祿勳進爵王後鎮統萬卒謚恭子真襲降公真弟大拔封鉅鹿子

穆崇代人道武居獨孤部往來奉給時人無及者劉顯

之逆平文皇帝外孫梁眷密遣崇告道武曰顯若知
之雖刀劍剗割勿泄也崇來告難道武馳如賀蘭部
窟咄之難崇外甥于植等謀不軌崇夜告道武道武
誅植等後從平中原位侍中豫州刺史太尉宜都公
天賜三年卒謚丁公長子逐留賜爵零陵侯後罪廢
子乙賜爵富城公卒於侍中謚曰靜子真尚長城公
主拜駙馬都尉後離婚位南部尚書侍中卒謚曰宣
孝文追錄功臣命崇配饗又令著作郎韓顯宗與真

選定碑文建於白登山

賀狄干代人世為將以平當稱稍遷北部大人登國初
與長孫嵩為對明於聽察為人愛敬道武遣狄干致
馬千匹結婚於姚萇萇歿興立因止狄干道武遙
賜爵襄武侯加秦兵將軍後擒興將狄伯支等興以
駿馬千匹贖伯支而遣狄干還道武見其言語衣服
類秦以為慕而習之因被害

尉諾代人古真弟以忠謹著從圖中山先登傷一目道

武歎曰諾兄弟並毀目以建功效誠可嘉也賜安樂
子從平姚平拜國部大人太武時改邑遼西公卒子
歡襲

許謙字元遜代人少有文才善天文圖讖學建國時歸
附昭成擢為郎中令兼掌文記與燕鳳俱授獻明帝
經後徙長安從苻堅弟行唐公洛鎮和龍尋以繼母
老辭歸登國初遂歸道武為右司馬與張袞等參贊
初基慕容寶來寇使謙告難於姚興興遣將楊佛嵩

來援佛嵩稽緩道武命謙為書遺之佛嵩乃倍道兼
行賜謙爵關內侯及慕容垂卒謙勸進并州平為陽
曲護軍賜爵平舒侯卒贈幽州刺史高陽公謚文子
洛陽襲為雁門太守進爵北地公卒謚恭

和跋代人世為附臣至跋以才辨知名道武擢為外朝
大人參軍國大謀雅有智算賜爵日南公從平中原
以功進尚書鎮鄴以破慕容德軍改封定陵與常山
王遵討賀蘭部別帥木易干破之出為平原太守跋

好修虛譽道武戒之不革被刑

長孫道生嵩從子忠厚廉謹道武愛其慎重使掌機密
與賀毗等四人內侍左右出入詔命明元時除南統
將軍冀州刺史太武即位進爵汝陰公遷廷尉卿從
征蠕蠕率衆出白黑兩漠間大捷而還從征赫連昌
為前驅遂平其國昌弟定走保平涼宋遣到彥之王
仲德寇河南以救定詔道生屯河上禦之遂誘宋將
檀道濟邀其前後追至歷城而還除司空加侍中進

封上黨王卒年八十二贈太尉諡曰靖道生廉約身
為三司而衣不華飾食不兼味一熊皮鄣泥數十年
不易時人比之晏嬰第宅卑陋出鎮後子弟頗脩繕
道生還歎曰昔霍去病以匈奴未滅無用家為今強
寇尚遊魂漠北吾豈可安坐華美也令毀其宅太武
世所在著績每建大議多合時機為將有權畧善待
士衆帝命歌工歷頌羣臣曰智如崔浩廉如道生與
從父嵩俱為三公當世以為榮子旻位少卿早喪

車路頭代人少以忠厚選給東宮為帳下帥天賜末明
元出於外路頭隨侍竭力及即位封宣城公忠意將
軍性無害每評獄處理常獻寬恕之議以此見重於
朝帝亦敬納之卒明元親臨哀慟贈太保宣城王諡
忠正喪禮依安成王叔孫俊故事陪葬金陵子眷襲
叔孫俊字醜歸建子少聰明年十五內侍左右性謹密
以便弓馬轉獵郎清河之變與元歷磨渾等歸明元
時明元左右惟車路頭王洛兒等得俊大悅以為爪

牙及即位稍遷衛將軍賜爵安成公朱提王悅懷刃入俊覺舉動有異於悅懷中得兩刃匕首執殺之明元以俊前後功重委以軍國大計羣官上事先由俊銓校後奏聞性平正柔和未嘗有喜怒色不諂上抑下奉詔宣外告示懇懇上下嘉歎泰常元年卒年二十八明元親臨哀慟贈司空安成王謚孝元賜溫明秘器載以輜輶車衛士導從陪葬金陵子蒲錫爵後有大功及寵幸貴臣薨賜賻送終禮皆依俊故事無

得踰之者俊弟憐襲父爵降丹陽公位尚書令涼州
鎮大將與鎮副將奚牧相糾坐誅

長孫翰肥子少有父風以善騎射為獵郎明元在外與
元磨渾等潛謀奉迎明元即位拾遺左右以功累遷
平南將軍鎮北境威名甚著太武即位封平陽王蠕
蠕大檀寇雲中太武親征遣翰出長川討之大檀北
遁追擊克獲而還遷司徒從襲赫連昌破之翰清正
嚴明善撫將士卒太武為之流涕親臨其喪喪禮依

安城王叔孫俊故事謚曰威陪葬金陵子成襲降公
位南部尚書卒陪葬金陵翰弟陵位駕部尚書性寬
厚好學愛士封吳郡公贈王謚恭陪葬金陵

薛彪子代人祖達頭歸魏道武賜爵聊城侯待以上客
禮賜妻鄭氏卒贈冀州刺史謚悼父野賸并太二州
刺史封河東公有聲稱卒謚簡彪子姿貌壯偉明斷
有父風為內行長典奏諸曹事當官正直內外憚之
文明太后臨朝出為枋頭鎮將素剛簡近臣嫉之因

小過黜為鎮門士獻文南巡彪子拜訴於路復除枋
頭鎮將累遷開府徐州刺史多惠政百姓便之沛郡
太守邵安下邳太守張攀贓汙案之於法安等誣彪
子南通賊孝文曰此妄矣推案果虛卒諡文

周幾代人少以善射為獵郎明元初為左部尚書以軍
功封交趾侯太武以幾有智勇遣鎮河南威信著於
外境進號宋兵將軍以萬人襲陝城卒於軍軍人歎
惜之歸葬謚桓子步襲

古弼代人少忠謹善騎射初為獵郎門下奏事以敏正
稱明元嘉其直而有用賜名曰筆後改名弼言其有輔
佐才也令典西部與劉潔等分綰機要敷奏百揆太
武即位以功拜立節將軍賜爵靈壽侯歷侍中吏部
尚書典南部奏事後征馮弘弼酒醉拔刀止部將高
苟子擊賊弘得東奔黜為廣夏門卒尋復為侍中與
尚書李順使涼州賜爵建興公鎮長安甚有威名及
議征涼州弼言不宜行微嫌之以其有將畧弗之責

假節督隴右諸軍討仇池楊保熾平之未幾楊文德復圍仇池弼攻解其圍文德走漢川時東道將皮豹子欲還軍弼使謂曰若其班師寇衆復至後舉為難不出秋冬南寇必來以逸待勞百勝之策也豹子乃止太武聞之曰弼言長策也制有南秦弼謀多矣景穆總攝萬機徵為東宮四輔與宜都王穆壽並參政事遷尚書令弼雖事務殷湊而讀書不輟端謹慎密口不言禁中事其功名等於張黎上谷人上書言苑

園過度宜減大半弼入欲陳奏遇帝與給事中劉樹
晷侍坐良久不獲申聞乃起於帝前摔樹頭掣下牀
以手搏其耳以拳毆其背曰朝廷不理實爾之罪帝
失容放晷曰不聽奏事過在朕樹何罪置之弼具狀
以聞帝竒弼公直皆可其奏弼曰為臣逞志於君前
非無罪也詣公車免冠徒跣自劾請罪帝召之曰卿
具冠履卿有何罪自今以後苟利社稷益國便人者
雖復顛沛造次卿為之無顧也太武獵河西弼留守詔

以肥馬給騎人弼命給弱者太武大怒曰尖頭奴敢
裁量朕朕還臺先斬此奴弼頭尖帝常名之曰筆頭
時人呼為筆公屬官懼誅弼曰田獵不過盤遊其罪
小不備不虞使我寇恣逸其罪大今北狄孔熾南虜
未滅故選肥馬備軍實為不虞之遠慮苟使國家有
利吾寧避死乎明主可以理干此自吾罪帝聞而嘆
曰有臣如此國之寶也賜衣一襲馬二匹鹿十頭後
車駕田山北獲麋鹿數千頭詔尚書發車牛五十乘

運之帝謂從者曰筆公必不與我汝輩不如馬運之
速遂還行百餘里而弼表至曰今秋穀懸黃麻菽布
野猪鹿竊食鳥雁侵費風波所耗朝夕參倍乞賜矜
緩使得收載帝謂左右曰筆公果如朕卜可謂社稷
之臣吳王立為司徒文成即位與張黎並坐議不合
旨俱免其家告巫蠱俱伏法時人冤之

尉眷代人諾長子忠謹有父風明元時為太官令侍臣
奚斤亡入蠕蠕眷追至虜庭擒之大檀前由是以驍

烈聞太武命分典四部加陳兵將軍文成時拜侍中
太尉封漁陽王錄尚書事文成北巡以寒雪議還眷
曰今去都不遠而旋敵必疑我有內難方寒雪宜更
進前不得遽返以啓敵心遂渡漠而還帝以眷元老
賜杖履上殿卒謚曰莊子多侯襲

穆觀字闡拔崇次子襲崇爵少以文藝知名明元中為
左衛將軍綰門下中書出納詔命及訪舊事未嘗有
遺漏尚宜陽公主拜駙馬都尉位太尉太武監國為

右弼出則統攝朝政入則應對左右事無巨細皆關決焉終日怡怡無愠色勞謙善誘不以富貴驕人泰常八年卒年三十五明元臨喪悲慟賜通身隱起金飾棺喪禮一依安城王叔孫俊故事贈宜都王諡曰文成太武每與羣臣談宴未嘗不歎息以為自道武來佐命勲臣文武兼濟無及之者

丘堆代人美容儀以忠謹入侍明元時拾遺左右遷散騎常侍太武監國為右弼即位賜爵臨淮公位太僕

略地關右宜城王奚斤表留堆合軍與赫連昌相拒
斤進擊赫連定堆守輜重斤為定禽堆走長安帝大
怒遣西平安頡斬之

于什門代人明元時為謁者使喻馮跋至和龍佳外不
入使謂跋曰大魏皇帝有詔須馮主出受然後敢入
跋使人牽逼令入見不拜跋令人案其項什門曰馮
主拜受詔吾自以賓主致敬何須苦見逼也與跋往
復聲氣抗厲不撓跋止什門什門於羣衆中回身背

跋披褲後襠以辱之既而拘留衣裳敗壞畧盡蟣虱
被體跋遺以衣拒不受歷二十四年後弘上表稱臣
乃送什門歸拜尚書侍御史太武下詔褒美比之蘇
武賜羊千口帛千匹進上大夫策告宗廟班示天下
豆代田代人明元時以善騎射為內細射從攻虎牢登
樓射賊矢不虛發以功遷內三郎從征赫連昌乘勝
追賊入其宮門門閉踰宮而出太武壯之拜勇武將
軍後從破赫連定得奚斤等以定妻賜之詔斤膝行

授酒於代田曰金爾身命者代田功也從討和龍有
功封長廣公卒於統萬鎮大將贈王諡恭子周求襲
來大千代人父初真官至後將軍武原侯與在八議大
千驍果善騎射永興初襲爵位中散朝賀日常著御
鎧盤馬殿庭遷內三郎幢將典宿衛禁旅用法嚴明
上下齊肅嘗從明元獵見獸在高巖上持稍直前刺
之應手而死帝嘉其勇壯太武初為常侍持仗侍衛
晝夜不離左右累從征伐以戰功賜爵廬陵公鎮雲

中興統白道軍事巡撫六鎮經略布置甚得事宜後
為吐京都將討平吐京胡卒喪還停於平城南太武
出遊還見而問之左右以對帝悼歎良久詔聽其喪
入殯城內贈司空謚莊子丘顏襲降晉興侯

賀迷代人太武敬哀皇后之從父也皇后生景穆初后
少孤父兄近親惟迷賜爵長鄉子卒贈光祿大夫五
原公

娥清代人少有將畧略著戰功稍遷給事黃門侍郎明

元南巡為中領軍將軍與宋兵將軍周幾等渡河畧地至胡陸以功賜爵須昌侯鎮枋頭太武初還進東平公後從平統萬遂與奚斤討赫連昌至安定昌弟定西走斤追之清欲尋水往斤不從遂為定擒克平涼乃得還後與古弼東討馮弘以不急戰黜為門卒卒於家子延賜爵南平公

陸侯代人曾祖幹祖引世領部落父突道武初數有戰功位離石鎮將上黨太守關內侯侯少聰慧明元初

襲爵位給事中典選部蘭臺事當官無所撓太武征
赫連昌詔督諸軍鎮以備蠕蠕與安頡攻克虎牢賜
爵建鄴公拜冀州刺史考天下第一轉虎牢鎮大將
復轉安定鎮大將追討休屠金崖羌狄于玉等皆獲
之遷懷荒鎮大將未暮諸高車莫弗訖懼侯嚴急請
前鎮將郎孤徵侯至京言不過周年孤身必敗高車
必畔帝疑不實以公歸第明年諸莫弗果殺孤召侯
問其故侯曰夫高車之俗上下無禮臣蒞以威嚴節

之憲綱欲漸加訓導使知分限也孤今獲還鎮欣其
名譽必專欲以寬惠臨之無禮之人易生陵傲然後
收之以威則人懷怨慙敗亂彰矣帝歎曰卿身乃短
慮何長也即日除散騎常侍從帝征蠕蠕破涼州別
督輜重又渡河南畧地仍遷長安鎮大將擊蓋吳於
杏城獲吳二叔諸將欲送京師侯獨曰不如私許吳
叔免其妻子使自追吳遂捨而與之期及期不至諸
將皆咎侯侯曰此未得其便耳必不背也後數日果

斬吳以至皆如其言侯之明畧獨決皆此類也遷內都大官安定盧水劉超等畔詔加都督秦雍諸軍鎮長安侯單馬之鎮申以威信示以成敗超猶無降意侯乃率其帳下見超超使人迎曰三百人以外當以弓馬相待三百人以內當以酒食相供乃將二百騎詣超超備甚嚴遂縱酒盡醉而還後偽獵詣超與士卒約曰今會發機當以醉為限侯乃詐醉上馬大呼斬超首士卒應聲縱擊遂平之帝大悅徵拜外都大

官文成踐祚以子麗有定策勲進爵東平王卒年六十七諡成有子十二人少子騏驎侍御中散轉侍御史太和初新平太守子高貴孝昌中兗州鎮東府法曹參軍

穆翰崇第三子平原鎮將西海王卒子龍兒襲降公卒子弼有風格善自位置涉獵經史與長孫承業陸希道等齊名孝文定氏族欲以弼為國子助教弼辭曰既遇明時耻沉泥滓會司州牧咸陽王禧入帝曰朕

與卿作州督舉一主簿即命弼謁之因為帝所知宣
武初為廣平王懷國郎中令數有匡諫之益除中書
舍人卒於華州刺史謚曰懿

穆顓崇第四子有才力以侍御郎從太武征赫連昌勇
冠一時賜爵泥陽子拜司衛監後從征白龍討蠕蠕
以功進爵建安公拜殿中尚書出鎮涼州還加散騎
常侍領太倉尚書文成時為征西大將軍督諸軍西
征吐谷渾坐逗遛免官徙邊文成以顓著勲前朝徵

為內都大官卒贈征西大將軍建安王諡曰康子寄
生襲

封敕文代人本姓是賁祖豆開府冀青二州刺史關內
侯父湮侍御長贈定州刺史章武侯謚隱敕文始光
初為中散稍遷西部尚書出為使持節開府領護西
夷校尉秦益二州刺史賜爵天水公鎮上邽詔征吐
谷渾拾歸於抱罕廣川公乙烏頭二軍會之軍次武
始拾歸夜遁敕文引軍入抱罕虜其妻子及人戶分

徙千家於上邽留烏頭守抱罕金城邊岡天水梁會據上邽東城南城攻逼西城敕文先設備賊乃退岡會復攻城氏羌一萬屯南嶺休官屠各二萬餘人屯北嶺為岡等形援敕文設奇兵大破之斬岡首岡衆復推會為主安豐公閭根率軍來助會謀遁夜半乃飛梯騰塹而走敕文先掘重塹於東城之外嚴兵拒鬪從夜至旦敕文謀曰困獸猶鬪而況於人乃以白虎幡招之應時降者六百餘人會等分遁敕文縱騎

騰躡死者大半略陽王元達因梁會之亂推天水休官王官興為秦地王討破之天安元年卒

閭毗代人太武時自蠕蠕國來附即恭皇后之兄也后生文成大安二年以毗為平北將軍賜爵河東公弟紇為寧北將軍賜爵零陵公並加侍中進爵王毗征東將軍評尚書事紇征西將軍中都大官子弟王二人公五人侯六人子三人同時受拜和平二年追謚后祖父延定襄康公辰定襄懿王毗卒贈太尉追贈

毗妻河東王妃子惠襲紇卒贈司空子豆賜名莊太
和中初立三長以莊為定戶籍大使甚有時譽十六
年例降公後為七兵尚書卒紇弟染外都大官冀州
刺史江夏公卒

尉地干眷弟機悟有才藝馳馬立射五的時人莫能及
太武時位庫部尚書加散騎常侍領侍輦郎奉上忠
謹尤善嘲笑甚見親愛參軍國大謀時征平原試衝
車以攻冢地干為索所縋折脅而卒帝親往哭慟贈

中領軍燕郡公諡曰惠子長壽位右曹殿中尚書賜
爵會稽公卒於涇州刺史

穆壽觀子襲爵尚樂陵公主拜駙馬都尉明敏有父風
太武愛重之擢下大夫敷奏機辨有聲內外遷侍中
中書監領南部尚書進爵宜都王加征東大將軍壽
辭曰臣祖宗先皇之世屢逢艱危幸天贊梁眷誠心
先告故得效功前朝流福於後昔陳平受賞歸功無
知今眷元勲未錄臣獨奕世受榮豈惟仰愧古賢抑

亦有虧國典太武嘉之乃求眷孫賜爵郡公征涼州
命輔景穆總錄機要內外聽焉次雲中將濟河帝別
御靜室召壽曰蠕蠕吳提來伏兵漠南殄之為易壽
信卜筮言不設備吳提果至壽欲築西郭門請景穆
避保南山惠保太后不聽乃止遣司空長孫道生等
擊之獲無損傷景穆監國與崔浩等輔政卒贈太尉
諡曰文宣子平國襲尚城陽長公主拜駙馬都尉侍
中中書監為太子四輔卒子伏干襲尚濟北公主拜

駙馬都尉卒諡康無子平國弟正國尚長樂公主拜
駙馬都尉子平城早卒與始平公主冥婚贈駙馬都
尉

于洛拔栗磾子有姿容善應對拜侍御中散太武甚加
愛寵因賜名焉轉監御曹令景穆在東宮厚加禮遇
洛拔恒畏避不敢結納襲爵為侍中尚書令百寮憚
之卒官有六子

長孫禮道生次子少以父任為散騎侍郎與襄城公盧

魯元等內侍恭敏有才志太武寵信之曰其父親近
吾祖子在我左右不亦宜乎

伊馥代人少勇健走及奔馬善射力曳牛却行神麈初
擢侍郎轉三郎賜爵汾陽子太武將討涼州議者咸
以無水草諫惟司徒崔浩勸行馥曰涼州若無水草
何得為國宜從浩言帝善之及克涼州大會於姑臧
帝曰崔公智計有餘吾亦不復竒之正竒馥弓馬士
所見能與崔同耳顧謂浩曰馥智力如此終至公相

浩曰何必讀書然後為學衛青霍去病亦不讀書而致公輔帝欲以馥為尚書封郡公馥辭曰中秘二省多諸文士請參其次帝賢之拜秘書監賜爵河南公拜司空清約自守政舉大綱大安二年領太子太保三年平尚書事卒子蘭襲位庫部尚書卒子盆生驍勇有膽氣累有戰功遂為名將以勲賜爵平城子為西道都督戰歿贈雍州刺史

乙瓌代人其先世統部落太武時瓌父匹知遣瓌入貢

帝留之環善騎射手格猛獸尚太武女上谷公主除
駙馬都尉賜爵西平公從駕南征都督前鋒諸軍事
勇冠三軍後進王又為西道都督卒年二十九贈太
尉公謚恭子乾歸襲有氣幹習書疏尤好兵法尚景
穆女安樂公主除駙馬都尉侍中獻文初為秦州刺
史有惠政孝文時為中道都將卒謚康子海字懷仁
位散騎侍郎卒謚孝子瑗字雅珍尚孝文女淮陽公
主除駙馬都尉累遷西兖州刺史天平元年舉兵應

樊子鵠戰敗死

周觀代人驍勇有膂力太武以軍功賜爵金城公位高
平鎮將善撫士卒號有威名後拜內都大官出為秦
州刺史撫馭失和部人薛永宗聚衆汾曲以叛觀討
之為流矢所中太武幸蒲坂觀驚而起創重卒爵除
陳建代人以善騎射擢三郎遷下大夫內行長太武討
山胡白龍輕之單將騎數十每自登山白龍伏壯士
出不意帝墜馬幾至不測建以身捍賊奮擊殺數人

被十餘創帝壯之賜別戶二十文成初出為幽州刺史假秦郡公孝文初徵為尚書右僕射加侍中進趙郡公密表啓南伐帝嘉之遷司徒進魏郡王卒子念生襲爵除

陸真代人父洛侯秦州刺史真少善騎射太武時拜內三郎真君中從討蠕蠕以功賜爵關內侯後攻懸瓠登樓臨射城中弦不虛發從至江還盱眙真功居多文成初進都昌侯為選部尚書後拜長安鎮將時初

置長虵鎮真率衆築城未訖而氏仇僞檀叛真擊平之卒城長虵而還東平王道符反于長安以真為長安鎮將進河南公長安平兵人素服其威信帖然安靜在鎮數年甚著威稱卒諡烈子延字契胡提有氣幹襲爵例降汝陽侯位懷朔鎮大將太僕卿受使綏慰秀容為牧子所害

劉尼代人曾祖敦有功為方面大人父婁為冠軍將軍尼勇果善射太武善之拜羽林中郎賜爵昌國子宗

愛殺南安王余秘之惟尼知狀勸愛立文成愛不聽
尼懼其有變密以狀告殿中尚書源賀仍共南部尚
書陸麗謀於是賀與尚書長孫渴侯嚴兵守衛尼與
麗至苑中麗抱文成於馬上入京城尼馳還東廟大
呼曰宗愛殺南安王皇孫已登大位有詔宿衛士皆
可還宮衆咸唱萬歲賀及渴侯登執宗愛賈周等勒
兵而入奉文成入登永安殿以尼為內行長封東安
公尋遷尚書右僕射為定州刺史在州清慎又為司

徒獻文特加尊重賜別戶四十皇興四年車駕北征
兵陣不整帝以其功重特恕之免官而已延興四年
卒子社生襲

陸馭侯長子多智有父風文成謂朝臣曰吾常歎其父
智過其軀是復踰於父矣少為內都下大夫每能逆
曉人意同事者無不愛之興安初賜爵聊城侯出為
相州刺史假長廣公為政清平抑強扶弱州中有德
宿老以友禮待之者十人號曰十善又簡取諸縣彊

門百餘人以為假子令歸家為耳目於是發奸摘伏
百姓以為神明無敢劫盜者在州七年家至貧約徵
為散騎常侍乞留者千餘人不許帝謂羣臣曰馭之
善政雖古人何以加之賜絹五百匹奴婢十口相州
吏人大斂布帛以遺之馭皆不受人亦不取為起佛
寺名長廣公寺後襲爵改封建安王宋司州刺史常
珍奇以懸瓠內附銜旨撫慰陷軍為奴婢者皆免之
人情乃定車駕討蠕蠕為選部尚書錄留臺事及獻

文將禪位于京兆王子推馭抗言曰皇太子聖德承
基四海瞻望不可橫議干國之紀臣請刎頸殿庭有
死無二久之帝曰馭直臣也其能保吾子乎遂以馭
為太保與大尉源賀持節奉璽綬傳位于孝文延興
四年卒贈本官諡曰貞王馭有六子琇凱知名

陸麗侯次子少以忠謹入侍太武親之賜爵章安子稍
遷南部尚書宗愛殺南安王余百僚莫知所立麗首
建大議與殿中尚書長孫渴侯尚書源賀羽林中郎劉

尼奉迎文成于苑中而立之社稷獲安麗之謀也由
是受心膺之任在朝者無出其右興安初封平原王
麗頻讓不聽乃啟以讓父文成曰朕為天下主豈不
能得二王封卿父子耶以其父侯為東平王麗尋遷
侍中撫軍大將軍司徒公復其子孫賜妻妃號麗固
辭不受帝益重之領太子太傅麗好學愛士常以講
習為業父憂毀瘠過禮和平六年療疾於代郡溫泉
聞文成喪欲赴左右止之曰王德望素重姦臣若疾

人譽慮有不測麗曰安有聞君父之喪方慮患難便
馳赴初乙弗渾悖傲麗數諍之由是見忌害之諡曰
簡王陪葬金陵孝文時配饗廟庭麗二妻杜氏生定
國張氏生獻定國在襁抱文成幸其第詔養宮內游
止常與獻文同年六歲為中庶子獻文踐祚拜散騎
常侍封東郡王定國以承父爵辭不受又以父爵讓
弟獻乃聽之俄遷侍中儀曹尚書轉殿中尚書前後
大駕征巡擢行臺錄都曹事超遷司空延興五年坐

事免為兵太和初復除侍中鎮南將軍泰益二州刺史復王爵八年卒於州贈本官諡莊

陸凱字智君馭子謹重好學位太子庶子給事黃門侍郎在樞要十餘年以忠厚見稱除正平太守在郡七年號為良吏孝文議革變舊風國戚多怏怏令凱私喻之乃稍解及兄琇陷罪凱哭無時節目幾失明訴冤不已至正始初宣武復琇官爵凱大喜置酒集諸親曰吾所以數年之中抱病忍死者顧門戶計耳今

願已遂以其年卒贈龍驤將軍青州刺史諡惠

穆多侯觀次子封長寧子位司衛監乙渾專權召司徒
陸麗麗時在溫湯療疾多侯謂曰渾有無君心大王
衆所望也去必危宜徐歸而圖之麗不從遂為渾害
多侯亦見殺

呂洛拔代人曾祖渴侯昭成時歸魏父匹知太武時為
西部長封蒙陽公洛拔以壯勇知名文成末為平原
鎮都將隨尉元攻宋將張永大敗之賜爵武城侯卒

子文祖補龍牧曹奏事中散以舊語譯註皇詔辭義
通辨為外都曹奏事中散後坐法

和其奴代人少有操行善射御初為三郎文成初封平
昌公累遷尚書左僕射與河東王閭毗太宰常英等
並平尚書事在官慎法不受私請遷司空加侍中及
乙渾執林金閭以擅殺尚書楊保年之罪歸之其奴
以金閭罪惡未分出之為定州刺史皇興元年詔討
長安鎮將東平王道符未至而道符敗軍還卒内外

歎惜之贈王諡曰宣子受襲

尉元字苟仁代人世為豪宗父目斤有勇畧位中山太守元善射為羽林中郎以匪懈見知稍遷駕部給事中賜爵富城男和平中遷北部尚書進太昌侯天安元年薛安都以徐州內附詔元為持節都督東道諸軍事尋與城陽公孔伯恭赴之宋兗州刺史畢眾敬亦遣東平太守章仇檣歸款元並納之遂長驅而進宋遣張永沈攸之屯下碭安都出城見元元依朝旨

授其徐州刺史遣中書侍郎高閭李璨與安都還入城別令孔伯恭撫安內外然後入彭城元以永仍據險要命安都與璨同守身率精銳揚兵於外分擊呂梁絕其糧道永捐城夜遁乃遣高閭與張儼對為東徐州刺史李璨與畢衆敬對為東兗州刺史而元拜開府都督徐州刺史淮陽公太和初徵為內部大官出為使持節鎮西大將軍開府統萬鎮都將甚得夷人之心三年進淮陽王聽乘步挽杖于朝齊高帝既

立多遣間諜扇動新人以元威名夙振使總率諸軍
捍之東南清晏遠近怙然入為侍中都曹尚書遷尚
書令進司徒十年例降山陽郡公頻表乞身詔許之
元詣闕謝引見命升殿勞宴賜元冠素服又詔曰前
司徒山陽郡公尉元前大鴻臚卿新泰伯游明根並
元亨利貞明允誠素位顯台宿歸老私第可謂知始
知卒希世之賢也公以八十之年宜處三老之重卿
以七十之齡可充五更之選於是養三老五更於明

堂國老庶老於階下孝文再拜三老親袒割牲執爵而饋於五更行肅拜之禮賜國老庶老衣服有差既而元陳孝順之道帝曰今承三老明言謹銘于懷禮畢賜步挽一乘詔曰夫尊老尚更列聖同致欽年敬德往哲齊軌朕雖道謝元風識昧獻則然仰稟先誨企遵猷旨故推老以德立更以元父焉斯彰兄焉斯顯矣前司徒公元前鴻臚卿明根並以冲德懸車懿量歸老故尊老以三事更以五雖老更非官耄耄罔

祿然尊事既高宜加殊養三老可給上公祿五更可
食元卿俸供食之味亦同其例十七年疾帝親省之
卒謚景桓公葬以殊禮給羽葆鼓吹假黃鉞班劔四
十人子翊襲改博陵郡公卒于恒州刺史謚順

尉撥代人父郗濮陽太守撥為太學生募從兗州刺史
羅怛擊賊於陳汝有功賜爵介休男討和龍擊吐谷
渾皆有功進爵子累遷杏城鎮將大得人和文成以
撥清平有惠績賜衣服獻文初為北征都將南攻懸

瓠進安城侯為北豫州刺史卒謚敬

尉多侯代人眷子少有武幹獻文時假節領護羌戎校尉敦煌鎮將至求輕騎五千西入于闐兼平諸國弗許孝文初又求北取伊吾斷蠕蠕通西域路帝善其許以東作方興難之為妻所害多侯弟子慶賓善騎射稍遷大中大夫明帝時送蠕蠕阿那瓌還國上表固爭不從後拜肆州刺史時尔朱榮兵威漸盛經肆州慶賓惡之據城不納榮襲之拘還秀容後還都起

為光祿大夫督鎮汝陰卒贈司空子瑾

山強代人美容貌身長八尺五寸工騎射彎弓五石為
奏事中散從獻文獵方山有兩狐起于御前詔強射
之百步內二狐俱獲位內行長子幼之金明太守

婁提代人獻文時為內三郎獻文上賓提謂人曰尚安
用活為遂引佩刀自刺幾死文明太后詔賜帛二百
匹

長孫觀旣子少以壯勇知名襲祖道生爵上黨王時異

姓王襲多降公帝以道生佐命先朝故特不降為征
西大將軍假司空督河西七鎮諸軍討吐谷渾拾寅
遁藏焚其城邑而還孝文初拜殿中尚書侍中吐谷
渾又侵擾復假觀司空討降之後為征南大將軍卒
諡曰定襄禮依其祖靖王故事陪葬雲中金陵

陸琇字伯琳馘第五子母赫連氏身長七尺九寸甚有
婦德琇年九歲馘欲以爵傳之琇曰苟非鬪力何患
童幼馘奇之遂立為世子馘卒襲爵琇沉毅少言雅

好讀書為侍御長累遷祠部尚書司州大中正坐事
免景明初試守河內郡咸陽之難以不先送其子曇
和逮繫卒琇弟凱上書訴冤詔復爵子景祚襲

于烈洛拔長子善射少言有不可犯之色少拜羽林中
郎累遷侍中殿中尚書與元丕陸叡李冲等各賜金
策許以不死進爵洛陽侯轉衛尉卿遷洛敕鎮代留
臺庶政一相參委車駕幸代執烈手曰宗廟至重翼衛
不輕卿當祇奉靈駕時遷洛邑烈與高陽王雍奉神

主于洛陽遷光祿卿十九年大選百僚烈子登引例
求進烈表引已素無教訓請乞黜落帝曰此乃有識
之言不謂烈能辨此乃引見登進為太子翊軍校尉
又加烈散騎常侍封聊城縣子穆泰陸叡潛謀代鄉
舊族同惡者多唯烈一宗無所染帝益器重之歎曰
元儼決斷威恩深自不惡然盡忠猛決不如烈也又
曰烈之節槩不謝金日磾除領軍將軍從征荆沔加
鼓吹一部二十三年帝討齊將陳顯達執烈手以京

邑為託及宣武會駕魯陽烈處分行留神守無變宣
武即位咸陽王禧遣家僮傳言求舊羽林武賁執仗
出入烈不許禧遣謂烈曰我是天子兒天子叔元輔
之命與詔何異烈厲色答曰向亦不道王非天子兒
叔若是詔應遣官人所由若遣私奴索官家羽林烈
頭可得羽林不可得也禧惡烈剛直出為恒州刺史
烈以疾辭景明二年正月初祭三公致齋於廟帝夜
召烈將直閣六十餘人宣旨召咸陽王禧彭城王勰

北海王詳衛送至帝前諸公各稽首歸政以烈為領
軍進爵侯自是長直禁中機密大事皆所參焉咸陽
王禧潛謀宣武出獵烈時留守處分有備奏曰禧等
不足為慮願緩蹕徐還以安物望禧逃追執之順后
立以世父之重彌見優禮及卒舉哀朝堂給東園第
一秘器贈太尉封鉅鹿郡公子祚襲

于果洛拔次子嚴毅直亮有父兄風歷朔華并恒四州
刺史賜爵武城子

穆亮字幼輔壽孫平國第三子早有風度獻文時起家
侍御中散尚中山長公主拜駙馬都尉封趙郡王加
侍中徙封長樂王孝文時除征南大將軍領護西戎
校尉仇池鎮將宕昌王梁彌博為吐谷渾所逼來奔
亮以彌博克悖請納其從兄彌承孝文從焉於是擊
走吐谷渾立彌承而還氏豪楊卜從軍二十一戰鎮
將抑而不聞亮表卜為廣業太守豪右咸悅境內大
安徵為侍中尚書左僕射尚書陸叡舉為司州大中

正後拜司空叅議律令例降爵為公尋領太子太傅
時將建太極殿亮稽首請稽之卜筮又以去歲役作
為功甚多太廟明堂一年便就若仍歲頻興恐人力
彫弊且材幹新伐願待逾年帝不從及遷都加武衛
大將軍以本官董攝中軍事帝南伐以亮錄尚書事
留鎮洛陽後帝自小平津汎舟幸石濟亮諫曰漢帝
欲乘舟渡渭薛廣德將以首血汙車輪帝乃感而就
橋渭之小水猶尚若斯况洪河有不測之慮帝曰司

空之言是也及罷預穆泰事上表自劾優詔還令攝
事亮固請久乃許之後徙封頓邱郡公以紹崇爵宣
武即位拜尚書令司空公卒宣武親臨小歛贈太尉
諡曰匡

朱長生于提並代人孝文時長生為員外散騎常侍與
提俱使高車高車王阿伏至羅責長生等拜長生拒
之至羅乃不以禮待長生以金銀寶器奉之至羅既
受獻長生曰為臣內附宜盡臣禮何得口云再拜而

實不拜呼出帳令衆中拜至羅慙其臣下大怒曰帳中何不教我拜而辱我於大衆奪長生等獻物內之叢石以兵脇之曰為我臣則活不降則殺汝長生與于提瞋目厲聲曰我為鬼不為汝臣至羅大怒絕其飲食從者三十人皆求至羅乃給以肉酪長生與提又不從乃各分徙之三歲放還孝文以節同蘇武拜長生河內太守提隴西太守並賜爵五等男從者皆為令長

苟顏代人本姓若干父洛拔內行長顏厚重清直武力
過人擢為中散小心謹敬賜爵建德男累遷司衛監
洛州刺史抑強扶弱山蠻畏威不敢為寇太和中歷
侍中都曹尚書進河南公顏好直言李惠李訢之誅
並致諫遷司空進河東王以舊老聽乘步挽杖於朝
大駕行幸三川顏留守京師沙門法秀潛謀顏率禁
旅收掩畢獲內外晏然卒謚僖王子愷襲例降公

陸昕之字慶始麗孫定國子風望端雅襲爵例降公尚

獻文女常山公主拜駙馬都尉歷通直郎景明中以從叔琇事免尋以主壻除通直散騎常侍歷宛青二州刺史並有政績轉安北將軍相州刺史卒贈鎮東將軍冀州刺史謚惠初定國二室河東柳氏生安保護陽盧氏生昕之後兩子爭襲僕射李冲助昕之由是承爵尚主而安保遂沈廢焉昕之容貌柔謹孝文親之宣武時年未四十頻撫三藩當世以為榮公主無男以昕之從兄希道第四子子彰為後

陸希道字洪度獻長子有風貌歷覽經史拜中散遷通
直郎坐父事徙遼西後得還以軍功賜爵淮陽男拜
諫議大夫累遷前將軍郢州刺史善于馭邊甚有威
畧轉平西將軍涇州刺史卒官贈撫軍將軍定州刺
史有六子士懋字元偉天平中以曾祖麗功特復襲
鉅鹿郡公位營州刺史士宗字仲彥尚書左外兵郎
中士述字幼文符璽郎中建義初並于河陰遇害士
沈出後昕之士廉字季脩建州平北府長史永安末

余朱世隆陷城見害士佩字季偉武定中安東將軍
司州從事希道弟希悅尚書外兵郎中

于勁字鍾葵洛拔第三子頗有武略位沃野鎮將賜爵
富昌子宣武納其女為后封太原郡公妻劉氏為章
武郡君後為征北將軍定州刺史卒贈司空諡恭莊
自栗磾至勁累世貴盛一皇后四贈公三領軍三尚
書令三開國公勁雖后父但以順后早世竟不居公

輔

于天恩洛拔第四子位內行長遼西太守贈東平將軍
燕州刺史子仁生大中太夫子安定平原郡太守高
平郡都將安定子提隴西郡守茂平縣伯周贈太保
建平郡公

長孫幼字承業以字行觀子六歲襲爵降公孝文時以
其幼承家業賜名字焉承業聰敏有才藝虛心愛士
為前將軍從南討宣武時為揚州刺史假鎮南大將
軍都督淮南諸軍事梁將裴邃虞鴻襲據壽春承業

諸子驍果遂頗難之號曰鐵小兒討河間王琛總衆援之琛欲決戰承業以久雨須持重琛弗從遂敗承業後殿還為大都督北討鮮于修禮尋解行臺遣河間王琛為大都督前到滹沱承業未欲戰琛不從行達五鹿為修禮邀擊遂敗與琛並除名尋復假鎮西將軍討蜀都督頻戰正平郡有功除平東將軍復爵後除尚書右僕射為行臺討蕭寶寅時背疽未愈靈太后勞之答曰死而後已敢不自力時子彥亦患脚

痺扶杖入辭尚書僕射元順曰吾等備位大臣各居
寵位危難之日病者先行母乃不可乎薛鳳賢據正
平薛脩義屯河東分據鹽池攻圍蒲坂以應寶寅承
業乃據河東時詔廢鹽池稅上表爭之及雒州平除
雒州刺史孝莊初封上黨王尋改馮翊後降郡公遷
司徒公加侍中兼尚書令大行臺仍鎮長安節閔立
遷太尉公錄尚書事韓陵敗斛斯椿使承業入洛啓
節閔誅世隆兄弟孝武初轉太傅以定策功更封開

國子請迴授其姨兄元洪超子惲武帝入關隨赴長
安位太師錄尚書事封上黨王大統元年卒贈假黃
鉞大丞相都督三十州軍事雖州刺史諡文宣子五
皆雄武

尉聿字成興代人性耿介明帝時為武衛將軍時領軍
元叉執權百寮莫不加敬聿獨長揖不拜尋出為涼
州刺史涼州緋色天下之最又送白綾二千匹令染
聿拒不受又諷御史劾之驛徵至京覆無狀還任卒

婁寶字道成伏連曾孫性惇樸好讀書明帝時仕至朔
州刺史考為天下最後隨大都督源子邕討葛榮師
敗被囚於榮軍變姓名匿戎伍以免害久之賊中有
朔州人識寶者將詣榮榮笑曰得免亂兵此行善之
驗也寶遇逃者密啓賊形勢規為內應上感其壯志
授寶子景賢員外散騎常侍郎榮滅始得還永安中
除假員外散騎常侍使蠕蠕時書為敵國儀寶責之
蠕蠕遂更稱藩孝武敕鎮恒農後從入關封廣寧縣

伯大統元年領著作郎監脩國史別封平城縣子後授國子祭酒侍中進儀同三司兼太子太傅攝東宮詹事寶清簡少言頗諳舊事位歷師傅守靖謙恭以此為人所敬後行涇州事卒於州

穆紹字永業亮子尚琅邪長公主拜駙馬都尉秘書監侍中衛將軍太常卿中書令七兵殿中二尚書母憂以孝聞又歷衛大將軍中書監侍中領本邑中正紹資性方重罕接賓客領軍元义往紹宅紹迎送下階

而已及靈太后欲黜乂紹繼成之以功加特進侍中
元順與紹同直常因醉入寢所紹擁被而起正色曰
老身二十年侍中與卿先君亟連職事縱卿後進何
宜相排突也遂謝事還家詔諭乃起除侍中託疾未
起故免河陰之害莊帝立余朱榮徵之捧手不拜榮
亦矯意禮之曰穆紹不虛作大家兒尋授尚書令司
空進爵為王給班劔四十人仍加侍中尋復本爵普
泰元年除驃騎大將軍開府青州刺史加都督未行

而卒贈大將軍尚書令太保諡曰文獻子長嵩字子岳襲爵位光祿少卿

朱瑞字元龍代郡桑乾人祖就沛縣令父惠行太原太守並贈刺史瑞長厚質直敬愛人士余朱榮引為大行臺郎中黃門侍郎仍中書舍人榮居之門下為腹心之寄封陽邑縣公除侍中兼吏部尚書改封北海郡公莊帝還洛又改封樂陵郡公仍侍中瑞雖為余朱榮所委而善處朝廷間帝亦賞遇之嘗謂侍臣曰

為人臣當須忠實至如朱元龍者朕待之亦不異餘人又為青州中正轉滄州大中正余朱榮死與世隆俱北走以莊帝待之素厚於路乃還帝大悅以瑞兼尚書左僕射為西道大行臺慰勞余朱天光余朱兆入洛復還京師都督斛斯椿先與瑞有隙數譖之於世隆遂被害太昌初贈開府儀同三司青州刺史諡恭穆

樊子鵠代郡平城人父興平城鎮長史歸義侯普泰中

贈荊州刺史子鵠逢北鎮擾亂南至并州余朱榮引
為都督府倉曹參軍使詣京師靈太后問榮兵勢子
鵠應對稱旨太后嘉之除直齊封南和縣子令還赴
榮建義初拜晉州刺史封永安縣伯永安二年以招
納叛蜀進中都縣公又兼尚書行臺政有威信尋徵
授都官尚書西荊州大中正兼右僕射為行臺進西
陽郡公尚書如故假驃騎將軍率所部為都督時余
朱榮在晉陽京師之事子鵠頗預委寄故在臺閣征

官不解後出為殷州刺史歲旱勅有粟家分濟貧者
并遣人牛易力多種二麥州內獲安余朱榮死子鵠
不從世隆等招以母在晉陽求移鎮河南莊帝嘉之
除都督豫州刺史行達汲郡間余朱兆入洛乃渡河
兆徵赴洛奪其部衆將還晉陽元曠以為侍中御史
中尉中軍大都督太昌初兼尚書左僕射東南道大
行臺總大都督杜德等追討余朱仲遠仲遠奔梁收
其兵馬時梁遣元樹據譙城詔子鵠與德討之樹大

敗入城遂圍之樹請歸南許之及樹衆半出子鵠擊破之擒樹及梁譙州刺史朱文開遷吏部尚書轉尚書右僕射尋加驃騎大將軍開府典選後除兗州刺史子鵠先遣腹心採察得失及至境太山太守彭穆參候失儀責讓之并數其罪狀州內震悚孝武帝入關子鵠據城為應南青州刺史大野拔率衆就之天平初齊神武遣婁昭等攻城久不拔昭以水灌城大野拔因殺子鵠以降

陸子彰字明達本名士沉年十六出後昕之事公主盡
禮正光初襲東郡公累遷給事黃門侍郎子彰娶咸
陽王禧女嘗養於彭城王第莊帝親之同諸姊建義
初封濮陽郡王尋復先爵天平中拜衛將軍潁州刺
史母憂去職元象中除齊州刺史又加驃騎將軍行
懷州事轉北豫州刺史仍除徐州一年厯三州當世
榮之還朝除衛大將軍右光祿大夫行瀛州事尋拜
侍中復行滄州事進號驃騎大將軍行冀州事除侍

讀兼七兵尚書行青州事子彰自莅瀛州後有政聲
加以虛已納物人士愛之除中書監卒贈開府儀同
三司諡文宣子彰好道術不忍用桑螵蛸子合藥訓
六子有法度

綦儁字櫟顯代人居洛陽孝莊時仕累遷滄州刺史吏
人畏悅除太僕卿余朱世隆等誅議所立儁避席曰
廣陵王雖為余朱扶戴當今之聖主也及孝武帝入
關神武深思儁言常以為恨尋除御史中尉僕射賈

顯度途遇排僞騶列倒僞入奏之加散騎常侍驃騎
大將軍左光祿大夫儀同三司僞善斛斯椿賀拔勝
勝出鎮荊州過僞別僞故見敗氍弊被勝遺之錢物
後兼吏部尚書復為滄州刺史徵還兼中尉章武縣
伯除殷州刺史卒贈司空公謚文貞子洪實字巨正
位尚書左右郎魏郡邑中正卒官

庾葉廣靈人任司空相州刺史秉法公平臨戎智勇才
冠諸將名震一方

長孫子彥本名僞承業子有膂力累從父征討封槐里縣子孝武帝立加中軍大都督行臺僕射鎮恒農從帝入關封高平郡公位儀同三司以從征竇泰戰沙苑加開府侍中及東復舊京又兼尚書令行司州牧留鎮洛陽後以不利班師大統七年拜太子太傅子彥少嘗墜馬折臂肘上骨起寸餘乃命開肉鋸骨流血數升言戲自若時以為踰于闐公末年石發卒文帝聞之慟哭曰失我良將贈雍州刺史弟子裕位衛

尉少卿

乙弗朗字通照其先東部人世為部落大人與魏徙代
後因家盛樂焉朗少有俠氣以善騎射稱孝莊末北
邊擾亂避居并肆間余朱榮見而重之以功封蓮勺
子隸賀拔岳為左廂都督孝武禦齊神武授朗閤內
大都督帝西入詔為軍司先驅靖路至長安封長安
縣公卒於岐州刺史初朗患積冷周文使人問疾朝
夕相繼臨終惟云恨不見河洛清平重反京縣以此

為恨

奚康生本姓達奚世居代徙陽翟祖直柔元鎮將內外
三都大官賜爵長進侯卒贈幽州刺史謚簡康生少
驍武彎弓十石矢異常箭太和初蠕蠕頻寇康生為
前驅軍主壯氣有聞由是為宗子隊主從征鍾離駕
旋濟淮五將未度齊將據渚斷津路募破中渚賊者
以為直閣將軍康生應募縛棧積柴因風放火燒其
船艦依烟直過飛刀亂斫投河溺死者甚衆乃假康

生直閣將軍後以勲除太子三校西臺直後吐京胡
自號辛支王康生從章武王彬討之分為五軍四軍
俱敗康生軍獨全率精騎一千追胡至車突谷詐墜
馬胡爭欲取之康生騰騎奮矛殺傷數十人射殺辛
支復為統軍從王肅攻義陽齊將張伏護自昇城樓
言辭不遜康生望樓射窗扉開即入應箭而斃齊將
裴叔業圍渦陽馳往一戰大破之及壽春降康生馳
赴之破走其將桓和陳伯之以功除征虜將軍封安

武縣男出為南青州刺史後梁郁州徐濟寇邊破擒之梁遣都督臨川王蕭宏勒甲十萬規寇徐州詔授武衛將軍一戰破之出為華州刺史頗有聲績轉涇州刺史以劾削官爵尋復之梁郁州內附詔康生迎接未發大舉征蜀假安西將軍即趣綿竹至隴右班師後除相州刺史徵拜光祿勳領右衛將軍與元乂同謀廢靈太后遷河南尹仍右衛領左右子難娶左衛將軍侯剛女即元乂妹夫也乂深相委託以難為

千牛備身而康生言氣高下又稍憚之正光二年二月明帝朝靈太后於西林園文武侍坐酒酣迭舞次至康生乃為力士舞及折旋每顧視太后舉手蹈足瞋目頷首為殺縛勢太后解其意而不敢言日暮太后欲攜帝宿宣光殿侯剛沮之康生曰至尊陛下兒隨陛下將東西更復訪問誰羣臣莫敢應靈太后自起援帝臂下堂而去康生大呼唱萬歲明帝引前入閣左右競相排閣不得閉康生奪其子難千牛刀斫

直後元思輔乃得定明帝既上殿康生將出處分遂
為人所執鑕於門下又與剛並在內矯詔決康生罪
難恕死從流哭拜辭父康生慷慨了不悲泣曰我不
反死汝何為哭也死時年五十四子難徙安州後又
令殺之靈太后反政贈都督冀瀛滄三州諸軍事驃
騎大將軍司空冀州刺史諡武貞追封壽張縣侯子
剛襲

山西通志卷一百十五